

Arabak ia hamar mila milioi gehiago ordainduko dio Jaurlaritzari 1992an

Estatuari, aldiz, aurtan baino 2.586 milioi pezeta gutxiago emango dio

Arabak 121.335,7 milioi pezeta (6.067 milioi libera inguru) gastatuko ditu datorren urtean, atzo Roberto San Ildefonso Diputazioako Hazienda arduradunak azaldutako datuen arabera. Zatirik handiena Jaurlaritzari emango dio, 63.280 milioi, aurtan baino 9.554 milioi gehiago.

FELIX IRIARTE / GASTEIZ

Arabako Diputazioak prestatu egin ditu jadanik datorren urterako aurrekontuak. Datorren asteko ostegunean, hilak 14, Roberto San Ildefonso Diputazioako Hazienda eta Finantza arduradunak Arabako Biltzar Nagusietan aurkeztuko du atzo jakitera emandako datuak, Arabako garbairaren oniritzia lortzeko. Guztira Arabak 121.335,7 milioi gastatuko ditu, aurtan baino 9.127 gehiago. Portzentaiari dagokionez % 8,13 gehiago.

Aurrekontuen zatirik handiena beste erakunde batzuei emango zaie. Jaurlaritzak lortuko du kopururik handiena, 63.280 milioi pezeta. Madrili ordaindu behar zaion kupoa, aldiz, txikiagoa izango da datorren urtean. Aurtan 17.511 milioi ordaindu bazaio Madrili, datorren urtean 2.586 gutxiago emango zaio, guztira 14.925. Udalek ere aurrekontuen zati bat eramango dute, 10.835 milioi, FOFIM erakundearen bitartez. Guztira hiru erakunde hauen artean 89.040 milioi pezeta jasoko dute Diputaziotik.

Erakundeei ordaintzen zaien dirua albo batera utziz, Arabako aurrekon-



Arabako Diputazioak datorren urteko aurrekontuak prestatu ditu.

OIAIDE

tua 32.294,7 milioikoa izango da, aurtan baino % 6,64 gehiago. Sarre-rei dagokionez, datorren urtean aurtan baino % 7,40 gehiago lortzea espero dute diputaziotik. Guztira zergen bidez, 103.818 milioi pezeta lortuko dituztela esan zuen San Ildefonsok. Zuzeneko zergen bidez 57.349 milioi, zeharkakoek 25.740,3 milioi izango dira, tasen bidez 2.087,6 lortuko dira eta BEZ zergak 18.641 milioi ekarriko du.

SAIL BAKOITZEKO KONTUAK

Sailez sail aurrekontuak egiteko bi irizpide izan dituzte kontuan, San Ildefonsok adierazi zuenez. Batetik gastu korronteen % 5eko gorakada, langileen soldatak alde batera utziz, eta inbertsio gastuen gehikuntza, % 8, gestio kredituak kenduz, bestetik. Inbertsio handienak dituzten sailak Ongizate Soziala eta Herrilan sailak dira. Lehe-

nak 6.371 milioiko aurrekontua izango du eta bigarrenak 6.046 milioikoa. Herrietarako aurrekontua 5.781 milioikoa izango da.

Diputazioako langileen soldatak ordaintzeko 5.092 milioi pezeta aurrirakusten du Diputazioak, iazkoa % 10,97 gehituz. Gutxi gorabehera Diputazioan mila langile inguru egiten dute lan. Datu horien arabera, batez beste langile bakoitzak bost milioi pezeta gordin irabaziko luke datorren urtean.

San Ildefonsok aurrekontuen zerbakiak ekonomiaren bilkaerarekin bat egiten dutela nabarmendu zuen, hau da KPI eta BPG kontuan izanik. Diputazioaren zorpetzea ia hiru mila milioikoa izango da, eta aurrekontuen helburu politikoa legegintzaldiaren amaieran Foru Aldundiko kutxa saneatuta uztea dela azpimarratu zuen Arabako Hazienda arduradunak.

'Har Hitza-k' astekari politiko independentientea izan nahi luke

A.S. / BAIONA

Patxa ezker abertzale taldeak 'Har Hitza' izeneko aldizkari politiko berriaren 0 zenbakia kazetarien aurrean aurkeztu zuten atzo Baionan. Astekari izateko xedea duen 'Har Hitza-ren' lehen zenbakia salgai izango da datorren abenduaren 12an. Anartean erredakzio taldeak 'Har Hitza' parte hartu edo laguntza eman nahi luke tenek dei egiten die eta datorren azaroaren 13an Patxoki elkartearen arratseko zortzietan egingo den bilerara gonbitatzen ditu.

'Har Hitza' sortzeko izan diren arrazoiei 0 zenbaki horrekin batera zabaldu zen gutunak azalpen batzuk ematen ditu: «orain arte, euskal prentsan, ezker abertzaleko bi aldizkari aurki ditzakegu (Ekaitza eta Enbata), biak bi alderdi politikori aski lotuak (EMA eta EB). Zenbait pertsonak ez dugu gure burua aldizkari horietan isladatua ikusten eta guri hala gertatu zaigunez, espresabide berri bat sortu behar zela iruditu zaigu».

Gutun berean esan denez, 'Har Hitza' sortzeko asmoa aurtan Arbo-

nan ospatu zen Aberri Eguna kolektiboko lagunak artetik dator «ikusiz denbora hartako eztabaidak nola aipatuak izan ziren euskal prentsan» gaineratzen dutenez. Alabaina, astekari berri horretako erredakzio taldea irekia izan nahi dela adierazi du eta «Euskal Herria aztertu nahi luke ezkerreko ikuspegi nazional batetik». Euskal Herriaren burujabetasunaren aldeko borrokan parte hartzeko tresna nahi izanez gero «'Har Hitza' kontzientzia nazional eta soziala eraikitzen lagundu nahi luke».

Tabloide erdiko tamaina eta zortzi orrialde dauzkan 'Har Hitza' 0 zenbaki horretan agertzen diren aipagaiei dagokionez, sarrera hitz baten ondoren hor daude irakurgai Zuberoka eta Nafarroatik pasatzen diren luketen gasbideaz artikulatu bat, 'Egunez egun' izena daraman Ipar eta Hego aldeko gertakarien kronologia, 'Han Hemenka' aipagai labur desberdinen sail bat, Frantziaren espertatuak dauden preso guztien ezaugarriak, 'Muga gainetik' Hego Euskal Herriko egoeraren azterketa, gazteen saila, eta azken orrian iritzia.

Foru Parlamentu berriak lehen plenoa egingo du arratsaldean

IRUÑEA

Nafarroako Parlamentuak osoko bilkura egingo du gaur arratsaldeko lau t'erdietan, parlamentari berriek kargua hartu zutenetik aurreneko aldiz hain zuzen ere.

Eguneko gaien artean, lege proiektu bat, bi mozio eta galdera bat azalduko dira. Lege proiektua onartua izanez gero, alderdi politikoei 66,7 milioi pezeta (3,5 milioi libera inguru) ezohizko dirulaguntza emango zaie.

Izquierda Unida-Ezker Batuak, bere aldetik, Foru Parlamentuaren aurrekontuen % 0,7 herri atzeratuen garapenean erabilteza proposatu du mozio batean. Proposamen hori Nazio Batuen Erakundeak onartu zuen, Hirugarren Mundua laguntzeko hartutako neurrien artean, baina lauzpabost estatuk bakarrik betetzen dute mundu osoan. Erice

Iuko zinegotziak proposamen bera egin zuen Iruñeko Udalean, baina gero erretiratu egin zuen, aurrekontuak eztabaidatzen direnean berriro aurkezteko asmoz.

Bigarren mozioa sozialistena da, Nafarroako Unibertsitate Publikoko errektorearen kargu gabetzea buruz. Jakina denez, UPNren Gobernuak Pedro Burillo kargutik kendu zuen agintea hartu bezain laster eta horren ordez Alberto Gonzalez donostiarrak izendatu zuen NUPEko buru. Burillo kargutik kentzea gogor kritikatu zuten bai ikasle eta irakasleek eta baita oposizioko talde guztiek ere. Oposizioko alderdi politikoen iritziz, Nafarroako Unibertsitate pribatua eta Opus Deiren eskua zegoen erabakiaren atzetik. PSN-PSOeko talde parlamentariak Alberto Gonzalez izendapena baliorik gabe uztea eskatu du gaur eztabaidatuko den mozioan.

Eak Corcuera Legea errekurrituko du «Konstituzioaren kontra doalako»

MADRIL

Eusko Alkartasunak errekurritu egingo du Espainiako Barne Ministeritzak aurkeztu duen Herri Segurtasun Legea Konstituzioaren kontrako delakoa, Joseba Azkarraga diputatuak atzo aditzera eman zuen. Azkarragaren esanetan, Jose Luis Corcuera Barne ministroaren legearen testuak «salbuespen egoera ezak ezartzen du».

Azkarragaren ustez, sozialisten taldeak sartutako aldaketak azalekoak izan dira. Lege proiektu hau «eskuarmen autonomikoak zapaltzeaz gain, 1978tik askatasun eta es-

kubideek jasaten duten erasorik zuzenena da», Joseba Azkarragak adierazi duenez.

Guzti horrengatik, Eusko Alkartasunak «bere sinadurak bilduko ditu Espainiako Legebiltzarrean inkonstituzionalitate errekurtsioa aurrera eramateko eta beste horrenbeste egingo du Gasteizko Legebiltzarrean», Azkarragak jakitera eman zuenez.

«Gobernuaren akatsak eta narkotrafikoaren kontrako borrokan eraginkortasunik eza ezin dituzte herri-tarrek ordaindu», azaldu zuen Azkarragak. Eako diputatuek kontrako botoa emango diote lege proiektuari.

'Ekaitza' astekaria auziperatuko dute gaur

BAIONA

'Ekaitza' Ipar Euskal Herriko astekari politikoa, Baionako Penaleko Epaitegira deitua da gaur arratseko ordu bi t'erditan, Daniel Poulou Urruñako alkateak bere aurka egingako salaketa baten ondorioz. Hone-tan, Urruñako auzapezak iraintzat hartzen ditu 'Ekaitzak' «Infrenuz» sailean egindako baiezen batzuk, bere udal politikari buruz.

Ekaitzako idaztaldeak agiri baten bitartez auzi horretara abertzaleak deitzearekin batera, azpimarratu zuen bere jarrera ez daitekeela horrengatik aldatu. «Iruditzen zaigu Ipar Euskal Herriko bizilagunak aski helduak direla eta beraz, politika jauntxo batzuen nagusikeria egitateak salatzen segiko dugu, hauen gustukoa ez baldin bada ere», adierazten dute agiriaren.

Hirugarren aldia da jadanik Ekaitza astekaria auziperatua dela nahiz eta lehen aldian Frantziako Barne Ministeritzatik zetorren justizia salaketa ezereztatua izan zen bidean zegoela.

Maitia: «Hilketak izan direnez ezin da amnistiarik onartu»

BAIONA

François Maitiak, Pirinio Atlantiarretako departamenduko sozialisten idazkari eta Izurango alkateak adierazi duenez, ezinezko da amnistia ematea borroka armatuak dirauela. Kortsikan eta Guadalupen Frantziako Estatuak amnistia eman zuela ondoren, kasu horietan «bortizkeria baztertu» dutela argudiatu zuen.

'Argia' astekariak aste honetan argitaratu duen elkarrizketan, Maitiak «hemen galdera pausatua izan delarik, borroka armatua segitu nahi dute eta atxilotuak dirrelarik... amnistia? Hori ezin da. Borroka armatua utzita amnistia bidea irekia izanen da», ziurtatu zuen. Dena dela, Pirinio Atlantiarretako sozialisten idazkariak «beste zailtasun» batzuk ikusi zituen Euskal Herriaren kasuan: «Euskal Herriak hilketak izan direlarik amnistia ezin da onartu», eritzi zion.

Amnistia bidea aipatzean alderdi abertzaleek Hego zein Ipar Euskal Herriko presoak aipatzen dituztela esan zuen, denak euskal hiritarrek direla argudiatuta, «beraz, hor politikoei elkar-tu beharko dute eta Espainiako alderdi batzuek oso bortizki daramate beren borroka».

Europar azken garaian gertatzen ari diren independentzia prozesuei buruz, Maitiak azaldu zuen bere usteetan Euskal Herriak autonomia bidea sakonduko duela lehenik, «eta independentzia laster baztertu» du.

Maitiak gogorarazi zuen Iparaldeko hauteskundeetan alderdi abertzaleek guztira botoen % 20 eskuratzen dutela. «Hego Euskal Herriaren autogobernua dute, autonomia azkarra ere, euskaldun gehienek nahi dutena da bide horri jarraitzea eta egun batez menturaz, mugimendu horrek ekar lezake independentzia», esan zuen.